

欽定天文正義卷六十

霧占

蒙 霾 占 附

露占

霜占

冰占



霧占 蒙 霾 占 附

禮記月令仲冬行夏令氛霧冥冥鄭註霜降之氣散相亂也

爾雅地氣發天不應曰霧霧謂之晦  
史記天官書若霧非霧衣冠而不濡見則其域披甲而趨

隋書天文志霧氣若晝若夜其色青黃更相掩冒  
乍合乍散臣謀君逆者喪山中冬霧十日不解者  
欲崩之候 霧者衆邪之氣陰來冒陽 凡白虹



霧姦臣謀君擅權立威晝霧夜明臣志得申夜霧  
晝明臣志不申霧終日終時君有憂色黃小雨白  
言兵喪青言疾黑有暴水赤有兵喪黃言土功或  
有大風 凡夜霧白虹見臣有憂晝霧白虹見君  
有憂 凡霧氣不順四時逆相交錯微風小雨為  
陰陽氣亂之象從寅至辰巳上周而復始為逆者  
不成積日不解晝夜昏暗天下欲分離 凡霧四  
合有虹各見其方隨四時色吉非時色凶 凡霧  
氣四方俱起百步不見人名曰晝昏不有破國必

### 有滅門

開元占元命包曰陰陽亂為霧莊子曰騰水上溢  
故為霧董仲舒曰太平之世霧不塞壑京房易候  
曰甲乙有霧疾疫丙丁有霧旱戊己有霧隣國有  
城拔無軍有土功事庚辛有霧兵壬癸有霧為水  
河圖曰山冬大霧十日以上不除者山崩之候也  
山水脉也運斗樞曰四濁霧下天下寃天鏡曰天  
雨霧如黃土百姓勞苦奔亡不安名曰黃霧兵書  
曰白霧四面圍城必有兵到城下不出其日抱朴



子曰白霧四面圍城不出百日大兵至城下甘氏  
曰霧秋以庚申辛酉日氣色白東行為利客先舉  
兵者勝後舉兵者敗巫咸曰霧夏以丙丁巳午日  
赤黃氣西行為利客主人凶海中占曰霧冬以壬  
癸亥子日氣青黑色南行興軍動衆

觀象玩占春秋元命包曰陰陽氣亂而為霧霧者  
百邪之氣本於地而應於天是謂陰來冒陽其占  
為臣蔽主明小人擅權不利於上凡陰晦不見日  
月星昏氣襲人慘慘悽悽者兵亂之氣也故曰若

霧非霧衣冠不濡見則其邑被甲而趨凡霧從夜  
半至日中不開遂上為蒙者臣行姦政於民而君  
不悟也氣從夜半至日中不解遂合為霧者君行  
邪政於民而臣不諫也過日中似雨者臣強不避  
君也霧終日終時其國君有憂凡霧連五日不雨  
不風其地有亂兵起日出而霧連五六日以上期  
六十日兵起日中霧起至昏不止其地易主者四  
時日出即有霧其地大擾凡霧從四方來合於中  
央即為兵起霧下色如黃土名曰黃霧天鏡曰天



雨黃霧百姓奔亡又曰黃霧四塞國亂兵起京房  
曰黃霧四塞天下蔽賢絕道其災絕世兵書曰白  
霧四面圍城必有兵至城下不出其日無兵不出  
百日兵起又曰白霧四面圍城霧不入城城不可  
攻霧入城則其城必亡春三月清旦霧起再沉過  
三見命曰三帝謀兵不出六十日兵起夏三月卯  
時霧起再沉至三不出二百日兵起秋三月暴風  
甚雨朝夕見至三不出一年兵起冬三月疾風暴  
雨狀如大雪至三日不出百日兵起春乙卯日霧

兵起東方夏丁卯日霧兵起南方秋辛卯日霧兵  
起西方冬癸卯日霧兵起北方凡霧氣四合有虹  
見隨四時色無傷有所克則凶京房易候曰甲乙  
日霧人疾疫丙丁日霧有旱戊己日霧土功興軍  
在外則有拔城庚辛日霧有兵壬癸日霧有水甘  
氏曰春甲乙寅卯日霧氣色青出東行向季者客  
勝夏丙丁巳午日霧氣色赤出西行為利客主人  
凶四季戊己辰戌丑未日霧氣色黃出北行利客  
主人凶亂秋庚辛申酉日霧氣色白出東行利客



先舉兵者勝後舉者敗無軍在外為興兵冬壬癸  
亥子日霧氣色黑出南行利客主人受其害凡子  
日皆有霧馬馳人走四時同然亥日有大霧從子  
卯上來賊至邊城急防之戊午日霧起累日不解  
兵起若有兵在外為有攻戰十月壬癸日有赤霧  
其地有兵冬三月庚辛日霧不出三年兵革滿野  
四時受商之日夜半大霧至日中者兵大起近期  
七日若三日內有雨即解八魁日陰霧兵大起春  
見秋發夏見冬發秋見春發冬見夏發霧在其軍

中則其邦君死將軍罷八魁日見陰陽書凡風霧  
晦冥不辨晝夜陰為陽臣制君兩軍相當有霧即  
日有微雨者客勝霧而不雨者主人勝霧已除而  
氣彌天者賊多晴明賊少赤霧如塵沾衣冠亂兵  
起

管窺輯要銀山常出白霧夏夕霧一至再三不出  
二百日兵起戊己日霧三日不止者其下必有大  
戰商日霧者金日也霧起夜半而大霧及日中兵  
大起人聚為賊近期七十日若三日有雨災解霧



從外入城有賊攻城霧從內出有兵逃出子年有大霧有大水蚕繭穀麥傷凡雨而江湖上忽有霧復暗其水不見波濤高下以霧為準霧高五尺水汎五尺霧高一丈或至三丈五丈霧至處水汎至也

### 蒙占

爾雅天氣下地不應曰霽邢昺疏郭云言蒙昧洪範云曰霽鄭註云霽聲近蒙詩零雨其蒙則霽是天氣下降地氣不應蒙闇也

隋書天文志凡連陰十日晝不見日夜不見月亂風四起欲雨而無雨名曰蒙臣謀君故曰久陰不雨臣謀主

開元占釋名曰濛日不明濛蒙蒙然也春秋潛潭巴曰大濛三十日羣猾起抱朴子曰若濛氣圍城或入於城則外兵得入若濛氣從內出主人出戰孔演圖曰猾待期則赤濛沾冠

觀象玩占蒙者濛濛日不明也又曰在天為蒙在地為霧日月不見為蒙前後人不相見為霧蒙霧



交錯陰邪干正凡大蒙連三日羣猾起

霾占

詩邶風終風篇終風且霾

爾雅風而雨土為霾

隋書天文志凡天地四方昏濛若下塵十日五日  
以上或一日或一時雨不需衣而土名曰霾故曰  
天地霾君臣乖大旱

露占

禮記月令孟秋之月白露降季冬行秋令則白

露蚤降

鵬冠子聖德上及太清下及太寧中及萬林則膏

露下

瑞應圖甘露者神露之精也王者和風茂則降於  
草木食之令人壽露色濃甘者謂之甘露王者施  
德惠則甘露降於草木甘露者美露也神靈之精  
仁瑞之澤其凝如脂其甘如飴一名膏露一名天



酒王者德至於天和氣感則甘露降於松柏  
宋書符瑞志栢受甘露王者耆老見敬則見  
芾受甘露王者尊賢愛老不失細微則見  
開元占元命包曰陰陽散為露魯子曰陽勝則散  
為露蔡氏月令曰露者陰液也暘為露論衡曰露  
秋氣所生也五經通義曰和氣津凝為露從地出  
觀象玩占露不降者天氣不下施也君不恤民之  
應其占為旱亦為其地有火災

### 霜占

易坤卦初六履霜堅冰至象曰履霜堅冰陰始凝  
也馴致其道至堅冰也

詩小雅正月篇正月繁霜註正月夏之四月繁多  
也言霜降失節不以其時也

禮記月令孟春行冬令雪霜大摯 季秋之月霜  
始降 孟冬行秋令則雪霜不時

開元占考異郵曰霜者陰精冬令也四時相代以  
霜收殺霜之為言亡也物以終也天鏡曰霜非時



而殺草是時而不殺並為蟲蝗是謂大饑  
觀象玩占天氣下降而為露清風薄之而成霜霜  
所以肅萬物消侵沴當降而不降與當殺物而不  
殺物者政弛而慢不當降而降與不當殺物而殺  
者政急而殘故隕霜不殺草與隕霜殺菽春秋皆  
書以記異在國都則戒在君相在外則戒在守土  
之官京房曰誅殺無辜則非時隕霜霜所以成萬  
物刑罰所以誅不仁刑罰妄行誅殺不當則天應  
之以隕霜於春於夏臣依公結私誅殺無罪則霜

下在土依公結私以緩有罪則霜附木殺罰不由  
上則霜見風而飛此皆刑罰不法之所致也霜未  
見日而消以喜怒行刑罰也霜見日而不消執法  
堅不可犯也天陰不見星而霜臣擅誅罰也一曰  
晝夜不明而隕霜君欲行刑有疑于心而徑行之  
也隕霜殺五穀刑罰慘酷也隕霜不殺草威不行  
也天鏡占霜不殺物來年蟲害五穀大饑霜止樹  
頭而不下地者不請決罪而上不下也霜在草根  
土隙而不着木葉高處者刑罰專施於下賤而無



所伸也霜無芒者行刑罰而哀其人也霜芒向下  
專以法繩下霜芒旁指以旁言刑殺人也霜下翩  
翩其狀如雪者知其所信任為邪而不以為意也  
春霜人病京房曰春霜殺草木是謂陰隆君弱臣  
強下不事上夏霜君死國亡正月霜下着物見日  
不消小人在位君子在野百物不實牛馬多疫死  
着樹凍損木枝讒言傷賢臣冬三月無霜蟲不蟄  
來年蝗蟲螟螣傷害五穀萬物不成人災疾地鏡  
曰視古屋無人居者其瓦上獨無霜則下有寶藏

軍中霜成芒角遍於旗槍之上師不可動天霜晝  
下刑罰妄行霜下有聲外兵來伐  
管窺輯要霜者季秋始降陽氣育物陰氣殺伐霜  
者天地之刑殺也



冰占

禮記月令孟冬之月水始冰 仲冬之月冰益壯  
季冬之月冰方盛水澤腹堅行夏令冰凍消釋  
開元占地鏡曰水以春冰有兵其歲不成水夏冰  
兵將起大饑民流秋冰下臣憂大兵起又曰水三  
月至八月忽有冰者大兵喪又曰水冬不冰饑兵  
觀象玩占冰者太陰之精至柔而為剛陰極而生  
陽也當冰而不冰者政失之舒也未當冰而冰與  
當釋而不釋者政失之急也故春秋書無冰皆為



國君失政權移於下之應京房曰夏水冰其國君  
疾病五穀不成有大兵水冬不冰有疾疫春冰下  
大臣死民疫秋禾不成秋冰下人憂兵起

[illegible]